



Nuuk 23. januar 2012

Inatsisartut suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

Suliffeqarfinni Namminersorlutik Oqartussat ataanni inissisimasuni, illoqarfiup nunattaluunniit avataaniit atorfinitsitsinermi, piumasaqaateqarnerluni, piffissami aaliangersimasumi aatsaat sulisimagaanni angerlamut angalanermut pequtaasalu assartornerannut aatsaat akiliussisoqartassasoq?

Qulaani apeqqutigisama assinganik, Namminersorlutik Oqartussat suliffeqarfiutaanni selsskab-iunngitsuni aammalu tamakiisumik ilaannakuusumilluunniit selsskab-iutaanni atorfininnermut piumasaqaateqartoqarnersoq Naalakkersuisut ilisimasaqarfiginerlugu? Piumasaqaateqartoqartarsimangippat suliffeqarfimmik piginnittut piginneqataasutulluunniit (Naalakkersuisunit) piumasaqaatigineqarnissaa eqqarsaatigineqarnerluni?

Malik Berthelsen, Siumut

Tunngavilersuut:

Kalaallit Nunaanni Namminersorlutik Oqartussat ataanni illoqarfiup nunattaluunniit avataaniit atorfinitsitsinermi soraarninngornermilu 2009-imi katillugit 62mio.kr. missaat atorneqarsimapput. Erseqqissaatigissavara kisitsit tassani taamaallaat pisortaqarfinni Namminersorlutik Oqartussat naatsorsuuserisoqarfianiit suliarineqartartut kisimik pineqarmata.

Atorfinitsitsinenermuinnaq ukiumut 62mio.kr. aningaasarpapilussuupput. Taamaattumik paaserusuppara ukiuni makkunani aningaasaqarniarnikkut naammattusaarfiusumi atorfinitsitsinermi piumasaqaateqartoqarnersoq, piffissami qanoq sivisutigisumi aatsaat sulisimagaanni angerlamut angalanissaannut pisataannillu akiliussisoqartarnersoq?

Namminersorlutik Oqartussat selsskab-iutaat immikkut siulersuisoqarlutik ingerlagaluartut innuttaasunit tamanit pigineqarmata/piginneqataaffigineqarmata, aammalu akiitsuminnut akilersuinnaanissartik atortunilluunniit nutarsaanissaminnut akissaqarumallutik aningaasartuutikillisaanissartik oqaatigisarmassuk, piginnittut Naalakkersuisut qulaani apeqqutinnut ilisimasaqarnerisut paaserusukkalarpara.